



Kalaallit Nunaanni eqqartuussisarnermik Inatsisip allanngortinnissaanut Inatsimmut missingiut (Pinerlunnernit eqqorneqartut inatsisitigut inissisimanerannik pitsanngorsaaneq) aamma Pinerlunnernit eqqorneqartunut naalagaaffimmit taarsiissutit pillugit Inatsisip allanngortinneqarnissaanik inatsisit assigiinngitsut kunngip peqqussutaatigut Kalaallit aalajangiiffigisassaattut siunnersuut.

(Ineqarnermut, Attaveqarnermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)
(Siullermeerneqarnera)

Demokraatit annerusumik iluarisimaarpaat, uuma siunnersuutip pinerlineqarsimasut pisinnaatitaaffiisa pitsanngorsarnissaannik aqqeeqataasussaana. Tamanna pinerlineqarsimasut ulluinnarni toqqissisimanissaannut illersorneqarnissaannullu pingaaruteqartorujussuuvoq.

Naammattumilli iliuuseqartoqannginneranut isumakuluuteqarnerput takutikkusupparput. Ippassaq immikkoortoq 157 oqaluseraarput annertunerusumik pineqaatissiisarnissamut tunngasoq pinerluttuliorsimasunullu periarfissanut tunngasoq. Tassanilu uagut Demokraatiniit pinerlineqarsimasut inatsisitigut illersorneqarnissaat ugartorparput; taakku uani siunnersuummi ersarissarneqarput. Isumaqarpugulli, pinerlineqarsimasut uani siunertarineqartumit annertunermik ikiorneqartariaqartut.

Annertuumik pinerlineqarsimasut kingunerlutsitsisarput, qularnanngilarlu qanigisaasut aamma eqqorneqartarmata, kingunerlutsitsisartunik sunnertinnermikkut.

Taamaattumik pitsaanagerusumik pinaveersaartitsineq ingerlattariaqarparput, sapinngisarput tamaat. Innuttaasut ilisimasaat annertusassavarput suliniummut tassunga, ataatsimoorluta inuiaqatigiinnik peqqissunik nukittuunillu pilersitsilluta akuersaannginneq sakkugalugu. "Killiliisa"p suliniutaasa iluaqutaat ilaasa oqallisigineqarnerlulernerannik aqqutissieqataasimavoq. Taamaattunik amerlanernik peqartariaqarpugut.

Inuiaqatigiinni pinerluffigitissimasunut amerlavallaanut kingunerlutsitsinernut nakorsaataasinnaasunik amerlanernik peqartariaqarpugut. Tamanna pisariaqarluinnarpoq, pinaveersaartitsineq iluatsilluortoq angussagutsigu.

Allatut oqaatigalugu; periarfissarsiuutsigu, pinerlineqarsimasut inatsisip allanngortinneratigut pisinnaatitaaffisik atorlugu kingunerlutsitsinerminnik nakorsarneqarnissamik periarfissinneqarnissaat. Isumaqarpugut tamanna isumaqarnerpaasoq pinerlineqarsimasunullu naleqarnerpaalluni soorlu assersuutigalugu ilisimatinneqarnissaannut, pinerliisimasup iperagaanerannik imaluunniit taassuma tusagassiuutini peqataaneraniit sanilliullugu. Inatsisissatut siunnersuutip imarisaata ersarissarpaa pinerlineqarsimasut inatsisitigut illersorneqarnissaannut iliuusissap nassuiaatigineqarneratigut, tamannali allaffissornikkut sulineruvoq, suliniutaanani imaaliillaannarlugu paasisaasanani, pinerlineqarsimasup inuunermini pitsaasumik ingerlariaqqinnissaanut ikiuutitut.



Taamatut oqaaseqaateqarluta siunnersuut Inatsisinut Ataatsimiititaliamut suliarisassanngorlugu ingerlateqqinneqarnissaa innersuussutigaarput, piumaffigalugillu sukumiisumik misissorneqassasoq, siunnersuumut ilanngunneqarsinnaanersut, kingunerlutsitsinernut nakorsartinnissamut pisinnaatitaaffiit aammalu pinerlineqarsimasut inatsisitigut illersugaaneriniq pitsanngorsaataasinnaasut.